

天尊告白

- 第一戒者不得違戾父母師長反逆不孝
- 第二戒者不得殺生屠害割截物命
- 第三戒者不得叛逆君王謀害家國
- 第四戒者不得淫亂骨肉姊妹姊妹及佗婦女
- 第五戒者不得毀謗道法輕泄經文
- 第六戒者不得汗漫靜壇單衣裸露
- 第七戒者不得欺凌孤貧奪人財物
- 第八戒者不得裸露三光厭棄老病
- 第九戒者不得耽酒任性兩舌惡口

道藏輯要

雲笈七籤
九

二

并集二

第十戒者不得兇豪自任自作威利

右此十戒當終身奉持

大戒上品

并序

太上洞玄靈寶消魔寶真安志智慧本願大戒

上品經云太極仙公於天台山靜齋念道稽首禮拜請問太極法師徐來勒曰弟子有幸得侍對天尊自聞微言彌綸萬劫洞觀道源過泰之歡莫有喻也願立少好神仙白日飛騰之道必想上聖恆以髣髴大經微遠妙頤難通將稟口訣釋我冥津洞暢虛漠有無都盡矣近而未究人生宿世因緣本行之由今願天尊覺所未悟是時太上玄高真人嘯咏步虛洞章歡然含豫

輝金顏而言曰子以累劫念道致太極玉名寄慧人中將獨步
玉京超逸三界巍巍乎太上仙公之任矣故慈心於天人念度
於後學也常以外身濟物有德而弗名玄都所詮諒不虛矣而
謂太極真人曰卿受太上虛皇道君之教爲其師保亦必盡教
以高上大洞之淵蹟也豈俟彼多陳乎吾受任忝爲都教之法
師至於執卷由子矣太極真人答曰此童真之人名刊金簡才
質清遠景秀太上玄微洞虛故當爲仙公之任宏道大度者也
吾忝受教化愧不足爲彼宗匠太上有命何敢不傾軫哉衆妙
之統仰賴於法師矣太極真人又曰夫道無也彌綸無窮子欲
尋之近在我身乃復有也因有以入無積念以得妙萬物芸芸

道藏輯要

雲笈七籤
九

三

井集二

譬於幻耳皆當歸空人身亦然身死神逝喻之如屋屋壞則人
不立身敗則神不居當制念以定志靜身以安神寶氣以存精
思慮兼忘冥想內視則身神並一身神並一近爲真身也此實
由宿世本行積念累感功濟一切德蔭萬物因緣輪轉罪福相
對生死相滅貴賤相使賢愚相傾貧富相欺善惡相顯其苦無
量皆人行願所得也非道非天非地非人萬物所爲矣正由心
耳此對既鍾亦難脫也弱喪之徒信道者少宿命者多不積善
定念修德理身而欲忽德忘身強求外物其可得哉既已不尅
莫不傷身矣故有道之士取諸我身無求乎人道言修身其德
乃真斯之謂也夫學道不受大智慧道行本願上品大戒無緣

上仙也子有宿命是以見此經其文隱祕立信効心然後而傳
不可妄示不信必發異念異念既生彼此獲罪是故藏之於無
待有應爲仙王者乃告焉是時雲龍踊躍諸天散華飛香奏烟
山海靜波觸類竄默鬼魅消亡神魔降伏五苦俱解長離地獄
惡者返善信順受福爾乃命太極侍經仙人劉文靜披雲韞而
授經也太極真人曰宿世禮奉經師口誦身行布施厄困願樂
三寶君親忠孝遠慕山水棲憩賢儒虛心有道燒香散華護度
一切修道補過信順宿命靜思忍情其行也上可昇仙度世下
可輪轉富貴生爲人尊容貌偉秀才智清遠爲人之道莫不具
足夫居世富貴笑於貧賤今報以貧賤居世好殺今報以傷殺

道藏輯要

雲笈七籤
九

四

井集二

居世輕易笑於醜陋今報以醜陋居世聰明不教於人今報以
頑塞居世常康笑於困病今報以滯疾居世不信道笑於經教
今報以下愚長與道隔女人居世奪人壻者今報以少寡男子
居世誘人婦女今報以鰥獨居世發心爲夫婦而後世不得俱
生人道死爲鬼魅今報以本念成於邪病自非大法莫有解其
宿纏而消此邪病矣夫爲父母兄弟姊妹夫妻君臣師保朋友
皆先世所念願爲因緣展轉相生莫不有對者哉故曰倚伏難
窮矣唯學仙道士當兼忘因緣絕滅生死同歸乎玄以入妙門
能如是者始可與言學道之本也

若見居家妻子當願一切早出愛欲攝意奉戒

若見飲酒當願一切制於命門以遠禍亂
若見彩女當願一切守情忍色志慕賢貞
若見淫人當願一切除棄邪念翹心禁戒
若見婦人當願一切忍割浮華樂道自娛
若見貞人當願一切履信正化日入法門
若見衆人當願一切推仁無爭懷道安世
若見善人當願一切時刻存念仰軌真道
若見惡人當願一切棄凶卽吉不犯王法
若見貧人當願一切損身施惠後受大福
若見富人當願一切救濟萬物世世受祿

道藏輯要

雲笈七籤
九

五

井集二

若見貴人當願一切承其教旨悉令典訓
若見賤人當願一切勤修匪懈各得所爲
若見帝王當願一切奉仰王道孝如父母
若見主相當願一切受其教制四方歸仁
若見兵甲當願一切各念仁心天下讓賢
若見王子當願一切日歌太平係國承家
若見賢人當願一切履行其德道爲世宗
若見法師當願一切明解法度得道無爲
若見栖山道士當願一切悉見法門速得真仙
若見教化當願一切親受聖教皆爲淵博

若見聖人當願一切尊禮侍見諸國並瞻
若見仙人當願一切真道悉成飛昇天堂
若見城郭當願一切嚴整修飾以道爲基
若見大國當願一切歸宗慕德若水注海
若見小國當願一切知止虛沖安其所居
若見市朝當願一切羣賢雲萃悉宏正道
若見靜觀當願一切功德巍巍天人得道
若見齋戒行香當願一切道德日新庠序雅正
若見誦經當願一切盡上高座咸聞聖音
若見經教當願一切各各受讀禮習普行教化

道藏輯要

雲笈七籤
九

六

川

井集二

若見樓觀當願一切洞觀十方無所隱藏
若見高山當願一切智思無量輔成家國
若見栖憩茂林當願一切安居自在廢庇舍識
若見好學當願一切得成師宗養徒敷教
若見淨手當願一切常執經書無時暫輟
若見善口當願一切耽味洞經日新不厭
若見動足當願一切超步三界飛行上清
若見靜止當願一切滅景停真安閑空寂
若見飲食當願一切棄累入淨存德道味
若見大藏當願一切除其災害施爲福田

若見疾病當願一切以道自安免此苦厄
若見死喪當願一切學道常存濟度三塗
若見畋獵當願一切不爲始終入爲無罪
若見夷狄當願一切得生中國不生邊地
若見少年當願一切及時學問遂成學名
若見老病當願一切以道攝生不更衰老
若見三光當願一切普明靈曜闇冥卽消
若見雲雨當願一切惠澤盈溢無所不宜
若見素雪當願一切常居潔白逍遙自在
若見靈風當願一切韞懷披散德流遐邇

道藏輯要

雲笈七籤
九

七
川上

井集二

若見淨水當願一切洗垢清虛平等其心
若見名香當願一切受茲芳淨衆穢肅然
若見好華當願一切樂散諸聖相好具足
若見車馬當願一切得道無爲乘風駕龍
若見絃歌當願一切翫經歎法以道娛樂
若見福食當願一切無不飽滿世享天厨德流後人如水歸海
宗廟裔長常居貴盛世與四輩俱生王家
若見散施當願一切禍滅九陰福起十方德如山海莫不興隆
七祖生天子孫賢忠富貴巍巍所欲皆從學道飛仙駕雲乘龍
道士坐卧常願我等四大合德同體道真長存玄都師友自然

濟度十方天下受恩逍遙無爲洞觀妙門

禮經祝三首

真人人口訣云侍經仙童玉女聞此祝皆歡喜而祐兆身也是大經悉用此祝而禮拜矣若冥心禮經者亦心祝其文乃上仙之祕祝也

第一首

樂法以爲妻愛經如珠玉持戒制六情念道遣所欲淡泊正氣
停蕭然神靜嘿天魔並敬護世世受大福

第二首

鬱鬱家國盛濟濟經道與天人同其願縹緲入大乘因心立福
田靡靡法輪昇七祖生天堂我身白日騰

第三首

大道洞玄虛有念無不啟鍊質入仙真遂成金剛體超度三界
難地獄五苦解悉歸太上經靜念稽首禮

道藏輯要

雲笈七籤

八

井集二

太極真人曰學昇仙之道當立千二百善功終不受報立功三
千白日登天皆濟人應死之難也施惠其人尤善矣學道當令
衆行合法廣建福田發大慈之心動靜常起道意能如是也吐
納服藥佩符讀經精進終身不倦豈有不得仙乎人無此德雖
服藥佩符讀經齋戒故終命而不驗矣學士明思要言太極真
人曰立三百善功可得長存地仙若一功不全則更從一始而
都失前功矣常有其念在於心膂者則是也若導人爲善卽爲
善功也太極真人曰常念嘯詠洞經修行大慈先人後身揚善

化惡斷絕眾緣滅念守虛心如太玄爲道是求始謂能言神仙之道也太極真人曰吾昔受太極智慧十善勸助德戒於高上大道虛皇世世宗奉修行大法度人甚易此自然之福也太上以普教天人令各得本願始入法門長存無爲不受十苦八難罪對罷散地獄休息三官日日甯閑世世榮樂咸脫羅網後生安泰天性恬然所願隨得其戒如上以傳賢信

十善勸戒曰勸助禮敬三寶供養法師令人世爲君子賢孝高才榮貴巍巍生爲人尊門族昌熾

三寶者謂道經師也能養生教善行爲人範是法師也

戒曰勸助治寫經書令人世世聰明博聞妙蹟恆值聖世見諸

道藏輯要

雲笈七籤

九

井集二

經教能誦章句

戒曰勸助建齋淨治令人世世門戶高貴身登天堂飲食自然常居無爲

戒曰勸助香油眾供令人世世芳盛香潔光明容貌絕偉天姿高秀

戒曰勸助法師法服令人世世閑雅逍遙中國不墮邊夷男女端正冠冕玉珮稱諸身飾

戒曰勸助國王父母子民忠孝令人世世多嗣男女賢儒不受諸苦

戒曰勸助齋靖讀經令人世世不墮地獄卽昇天堂禮見衆聖

速得返形化生王家在意所欲玩好備足七祖同歡善緣悉備終始榮樂道法轉至將得仙道

戒曰勸助眾人學經令人世世才智洞達動靜威儀常為人師戒曰勸助一切布施諫諍善事令人世世壽考富樂常無怨惱戒曰勸助一切民人除嫉去欲履行眾善令人世世安樂禍亂不生病者自愈仕宦高遷為眾所仰莫不吉祐門戶清貴天人愛育神魔恆護常生福地

太極真人曰人之行惡莫大於嫉殺貪奢驕淫也若此一在心伐爾年命矣挾之以學神仙者不亦悲乎

太霄琅書十善十惡

道藏輯要

雲笈七籤

十

卷

井集二

十善既行十惡自息惡行善大慈德成是以上品戒云卹死度生救疾治病施惠窮困割己濟物奉侍師主營建靜舍書經校定修齋念道退身讓義不爭功名宣化愚俗諫諍解惡邊道立井植種果林教化童蒙勸人作善施為可法動靜可觀教制可軌行常使然十善遍行謂之道士不修善功徒勞山林能信斯旨勤尋諸戒戒部甚多隨緣所得無數諸戒無央科律皆輔一神攝於三業三業者口身心也運動造作善惡無量無量善惡十為惡端一者妄言二者綺語三者兩舌四者罵詈此四曰惡返之則善五者貪愛六者竊盜七者姦淫此三者屬身八者嫉妒九者恚瞋十者邪癡此三者屬心心業最重為十惡根斷